

c) Impendere redditus in usus ad quos fundatione vel statuto destinantur. Parochus nullatenus distrahere potest aliove transferre huiusmodi bona aut res ad ecclesiam pertinentes, sine obtenta ab Ordinario licentia; quam ille non aliter concedere debet, quam si alias res meliores parochus reipsa substituat; nisi forte justa aliqua necessitas secus suadeat, quod episcopi prudentiæ statuendum relinquitur. Leurenus, Forum beneficiale, part. I, quæst. 446, apud Mau-
pied, lib. VI, cap. 15.

733. Jure non prohibetur assumi laicos in administratione bonorum ecclesiæ. Laici quicumque, etiam principes et reges, *per se* nullum jus habent sese immiscendi in regimine et administratione bonorum ecclesiasticorum, ut probat Fagnanus in capite *Ecclesiæ Sanctæ Mariæ*, De constitutionibus, num. 15; ex concessione tamen Sedis Apostolicæ, per concordata aut aliam viam, laicis in fabricis ecclesiarum competit aliquod jus administrationis in eisdem ecclesiis.

Attentis variis dispositionibus juris circa administratores laicos, hæc sunt retinenda juxta leges canonicas:

1º Matricularii seu administratores laici fabricarum eligi debent secundum synodales constitutiones, si adsint, aut juxta locorum legitimam consuetudinem, vel per ipsum parochum, aut de ejusdem consensu per parochianos, vel per ipsos matricularios.

2º Possunt semper revocari ab episcopo.

3º De rebus ecclesiæ, præter scitum parochi, quidquam disponere nequeunt; præterea nec ipsi, nec parochus de redditibus et rebus ecclesiæ quidquam disponere possunt, nec proinde instaurationes ecclesiæ facere, nec ejusdem dispositiones interiores, nec altaria, etc., immutare absque episcopi approbatione.